



ARUBA

NOTICIERO OFICIAL DI GOBIERNO INSULAR

ANA 1 - NO.1

MAART 1977

ARUBIANA PRINTS N.V.

GOBIERNO TA MEHORA ARUBA DEN APENAS 18 LUNA DI GOBERNACION

Ta visto cu ta reina den e pueblo di Aruba e conviccion cu e gobierno insular actual a haci mas pa Aruba den apenas 18 luna di gobernacion cu ningun otro gobierno a logra haci den un periodo similar. Desde Juli 1975 ora cu e gobierno nobo a tuma over gobernacion di nos isla, a surgi un optimismo grandi den e pueblo Arubano pasobra ariba tur tereno den nos comunidad mehoracion a cuminsa bira realidad.

Pa comproba con activo e gobierno nobo ta den su afan pa duna henter e pueblo di Aruba un mehor bida, nos ta repasa aki den e actividadnan y proyectonan cual gobierno a principia of completa den e corto periodo di 18 luna:

Audiencia Publico

Durante e un anja y mei di gobernacion nos diputadonan y consehero general di B.C., Señor Betico Croes, a kibra record den atende publico. Tur dialuna y practicamente tur dia centenares di persona ta acudi na nan oficianan cu un of otro problema. Nos diputadonan y consehero di gobierno ta hiba e lema, cu ta pueblo ta esun cu a duna nan e confianza y ta pa sirbi pueblo nan tey.



Dos hoben representando nos hubentud, hizando e bandera di Aruba oficialmente, dia 18 di Maart 1976.

Himno y Bandera

18 di maart 1976 ta un dia memorable den historia di Aruba. Nos dinamico gobierno for di principio di su gobernacion a cuminsa preocupa su mes pa e bandera y himno di nos isla. Un pais of isla mester di su propio bandera y himno. Tabata un dia grandi 18 di maart 1976. Un multitud enormemente grandi, di mas di 12.000 persona a yena stadion Wilhelmina, pa grita emocionalmente ora e himno "Aruba Dushi Tera" a wórdo toca pa promer bes como oficial di nos isla. Mas grandi tabata nan emocion ora dos hoben, representando nos hubentud, a hisa e promer bandera di Aruba, como nos bandera oficial, e bandera cu nos mester defende y respeta na tur momento. E pueblo tabata contento pasobra por fin nan a haya un gobierno cu a duna e pueblo di Aruba e balor, reconocimiento y su propio identidad, cu e mester den mundo. Awor nos tur mester lanta para y wak na laira y orguyoso, ora nos himno toca y nos bandera bai laira. Un himno y bandera cu ta di nos y cu ta representa nos nomber na tur parti di mundo.

(sigui lesa pagina 4)



Un bista di e multitud enorme cu a presencia apertura di nos himno y bandera di 18 di Maart 1976, den Wilhelmina Stadion, dia grandi den historia di Aruba.